



凡金銀器玩物  
皆屬金銀器  
金銀器之類  
金銀器之類  
金銀器之類  
金銀器之類  
金銀器之類  
金銀器之類  
金銀器之類  
金銀器之類

卷之十

卷之十

御撰通鑑綱目三編序

編年之書奚啻數十百家而必以朱子通鑑綱目為準通鑑綱目蓋祖述春秋之義雖取裁於司馬氏之書而明天統正人紀昭監戒著幾微得春秋大居正之意雖司馬氏有不能窺其藩籬者其他蓋不必指數矣嘗謂讀書立言之士論世為雖非如朱子具格致誠正之功明治亂興衰之故其於筆削鮮有不任予奪之私失褒貶之公者自綱目成而義指正大條理精密後儒有所依據踵而續之由宋迄元釐然方榮至明代君臣事蹟編輯之難更倍於諸書蓋明史已成於百年之後而世變風漓記載失實若復遲待將何以繼續編而示來許爰亟命儒臣法朱子通鑑綱目義例增損編摩大書以提要分注以備言每一卷成呈覽朕於幾暇亦時御丹鉛為之參定雖於天人一貫之

精微未之能盡而惟是謹嚴之義守而弗失簡正之旨志而必  
勉書既成羣臣舉唐太宗之事為言勉從其請而為之序云乾

隆十一年夏四月朔

御製并書



御製並書

經筵日講官起居注太保保和殿大學士兼吏部尚書翰林院掌院事三等伯加十三級臣張廷玉等言臣等奉

勅編次御撰資治通鑑綱目三編告竣謹奉

表恭

進者竊惟屬辭比事教起於春秋繫月編年法沿於紀載世綿千祀史閱百家宋溫國羅衆典以創鴻裁章程大備子朱子括羣言以標定論體例彌嚴洎乎成化諸儒續有宋元通鑑惟勝國興衰之迹在史官紀述之司事雖具於編摩義未昭於筆削秉權衡而不爽功之鉅者恆難垂典則於無窮道之明也有待欽惟

皇帝陛下以

天亶之聰而遜敏有

日新之德而緝熙敦志經考典之功闡稽古右文之治

凝神乙夜縱覽千秋謂纂述相承莫精於綱目而典型具在獨闕於有明宜遵曩哲之遺規用勒前朝之成迹於是

親披汗簡

特東鴻裁貫終始以立常經參異同而衡定案準平繩直提綱則義極謹嚴縷析條分舉目則事期精覈衷之正史汰臣僚飾美之詞證以羣編削野稗存疑之說翦裁枝葉綜括綱維褒誅定而衮鉞施法戒明而丹青炳揆以考亭之法則

聖合於賢登諸闕里之編則經尊於史昔者通史緝於梁后徒侈辭華晉書斷自唐宗無關體要未有乾心作範

睿式裁模昭懲惡勸善之方闡守經達權之教藻鏡開而天地朗奉以無私璇衡正而古今平歸其有極信聖人之述作極盛於茲蓋天下之文章莫大乎是臣等叨陪綴緝預列參稽學史而未擅三長受

經而漸窺五體稟

訓言以成統貫多愧專門承

指授以悟淵微竊欣盛遇伏願

天文光被

淵鑒宏開布在饗宮登之冊府踵麟編而高步藻耀六經俯狐史而旁羅罕籠百氏乾坤不朽精華畢貫

於羣心日月齊懸軌度永垂於奕世謹將

御撰資治通鑑綱目釐為二十卷繕寫清本裝成兩函謹奉

表恭

進以

聞

乾隆十一年四月二十七日

大學士伯

臣張廷玉

兵部侍郎

臣王會汾

日講官起居注翰林院侍講學士臣周長發

原品休致侍講學士臣楊椿

內閣侍讀臣蘇崇阿

國子監司業臣鶴年

翰林院編修臣柏謙

翰林院編修臣張映斗

翰林院編修臣朱荃

翰林院編修臣朱佩蓮

翰林院庶吉士臣章愷

內閣中書臣吳麟

御撰資治通鑑綱目三編總目錄

卷一 原卷一至卷五

原第一卷

起戊申元順帝至正二十八年明太祖洪武五年

凡五年

原第二卷

起癸丑明太祖洪武十六年

凡十四年

原第三卷

起丁卯明太祖洪武二十一年

凡十二年

原第四卷

起己卯明惠帝建文元年

凡十一年

原第五卷

起庚寅明成祖永樂八年

凡十六年

卷二 原卷六至卷十

原第六卷

起丙午明宣宗宣德元年

凡十八年

原第七卷

起甲子明英宗正統九年

凡十三年

原第八卷

起丁丑明英宗天順元年

凡十四年

原第九卷

起辛卯明憲宗成化七年

凡十七年

原第十卷

起戊申明孝宗弘治十八年

凡十八年

卷三 原卷十一至卷十五

原第十一卷

起丙寅明武宗正德元年

凡十六年

原第十二卷

起壬午明世宗嘉靖十四年

凡十四年

原第十三卷

起丙申明世宗嘉靖十五年

凡十七年

原第十四卷

起癸丑明世宗嘉靖三十二年

凡二十年

原第十五卷

起癸酉明神宗萬曆十九年

凡十九年

卷四 原卷十六至卷二十

原第十六卷

起壬辰明神宗萬曆二十年  
盡壬子明神宗萬曆四十一年

凡二十一年

原第十七卷

起癸丑明神宗萬曆四十一年  
盡庚申明光宗泰昌元年

凡八年

原第十八卷

起辛酉明熹宗天啟元年  
盡丁卯明熹宗天啟七年

凡七年

原第十九卷

起戊辰明莊烈帝崇禎九年  
盡丙子明莊烈帝崇禎十年

凡九年

原第二十卷

起丁丑明莊烈帝崇禎十七年五月  
盡甲申明莊烈帝崇禎十七年五月

凡七年有奇

御撰資治通鑑綱目三編卷一

原卷一  
共二十頁

申戊

起戊申元順帝至正二十八年明太祖凡五年

洪武元年盡壬子明太祖洪武五年  
元順帝至正二十八年○明太祖高皇帝  
帝洪武元年○是歲閏七月元帝出奔春正月吳相國李善長等尊吳王朱元璋為皇帝國號明

元璋先世家沛徙句容再徙泗州父世珍始徙濠之鍾離母陳氏元璋始生室中數有光起比長姿貌雄傑志意廓然年十七父母相繼歿孤無所依乃入皇覺寺為僧至正十二年從郭子興於濠州子興奇其狀貌留為親兵戰輒勝明年收里中兵得七百人子興署為鎮撫與徐達湯和等略定遠下滁州得李善長與語大悅之留掌書記十五年子興卒劉福通立韓林兒於亳檄元璋為副元帥不受遂渡江拔牛渚下太平取集慶路以次略定江左二十四年自立為吳王建百官遂降陳理執張士誠走方國珍盡有淮南浙東江西荆楚地二十七年命諸將北定中原善長帥百官勸進乃以是年春正月乙亥祀天地於南郊即皇帝位建元洪武

追尊祖考為皇帝

高祖考曰元皇帝廟號德祖曾祖考曰恆皇帝廟號懿祖祖考曰裕皇帝廟號熙祖考曰淳皇帝廟號仁祖妣皆皇后

立妃馬氏為皇后世子標為皇太子

后郭子興撫女也仁慈有智鑒好書史帝既定江南吳漢接境戰爭無虛日后手緝甲士衣履佐軍嘗言治天下以不殺人為本帝善之既即位欲官后族后謝曰爵祿私外家非法力辭而止乃追封后父馬公徐王修墓置廟標后長子也  
以李善長為左丞相徐達為右丞相

善長少習法家言有智計帝嘗從容問曰四方戰鬪何時定乎對曰漢高祖起布衣豁達大度知人善任五載成帝業今元綱既紊天下土崩瓦解公濠產距沛不遠山川王氣公當受之法其所為天下不

元順帝至正二十八年

足定也。帝稱善。諸將來歸者。善長察其材。言之帝。復為帝布款誠。使皆得自安。帝深倚之。自將征討。皆命居守。轉調兵餉無乏。嘗請立茶鹽法。斟酌元制。去其弊政。用益饒而民不困。帝稱吳王時。拜右丞相。至是改官制尚左。以為左丞相。

征南將軍湯和克福建。元平章陳友定死之。

友定守閩。帝命和由明州海道取福州。胡美由江西趨杉關。而別遣使至延平。招友定。友定置酒會諸將。殺使者。漉血酒中。與眾酌飲之。誓以死守。已聞杉關破。急分軍為二。以一軍守福。而自帥一軍守延平。和舟師抵福之五虎門。蟻附登城。守將遁去。參政尹克仁宣政使朶耳麻不屈死。僉院柏帖木耳殺妻女。縱火自焚死。時胡美已克建寧。和遂進攻延平。友定欲以持久困之。諸將請出戰。不許。數請不已。友定疑其部將殺一人。軍士多出降者。會軍器局災。城中礮聲震地。明師知有變。急攻之。友定呼其屬與訣。退入省堂。仰藥死。所部開門納明師。昇友定出水東門。未絕也。天大雷雨。友定復甦。械送京師。入見。帝詰之。友定厲聲曰。國破家亡。死耳。尚何言。遂併其子殺之。延平既下。興化泉州皆望風附。獨漳州路達魯花赤迭里彌實自殺。時稱閩有三忠。謂友定柏帖木耳。迭里彌實也。

元削擴廓帖木兒爵邑。命充魯李思齊討之。

元既奪擴廓帖木兒兵。分隸諸將。擴廓退軍澤州。元帝知擴廓勢孤。乃詔李思齊等東出關。與緬高合攻擴廓。而令關保以兵戍太原。擴廓憤甚。引軍據太原。盡殺朝廷所置官吏。於是元帝下詔削擴廓官爵。令諸將四面討之。

三月修女誠。

帝謂翰林學士朱升等曰。治天下以正家為先。正家之道。始於謹夫婦。后妃雖母儀天下。然不可俾與政事。嬪嬙之屬。不過備職事。侍中樞。恩寵或過。則驕恣犯分。上下失序。歷代政由內出。鮮不為禍。惟智者能察之於未然。其纂述女誠及古賢后妃事。可為法者。使子孫知所持守。

夏四月。新州進竹簞却之。

令四方無妄有獻。

征南將軍廖永忠取廣東。

永忠自福州。以書諭元行省左丞何真。曉譬利害。真即奉表迎降。永忠至廣州。降盧左丞。禽海寇邵宗愚。數其殘暴。斬之。廣人大悅。馳諭九真。日南。朱崖。儋耳。三十餘城。皆納印請吏。又遣陸仲亨略定清遠。英德。連州。廣東悉平。

征虜將軍徐達常遇春大破元兵於洛水北。元梁王阿魯溫以河南降。

徐達下山東。會遇春於濟寧。引舟師沂河趨汴梁。守將李克彝走。左君弼。竹貞等降。遂自虎牢關入。元守將脫因帖木兒以兵五萬陳洛水北。遇春單騎突陳。元兵二十餘騎攢槊刺之。遇春一矢殪其前鋒。大呼馳入。元兵大潰。追奔五十餘里。梁王阿魯溫降。嵩。陝。陳。汝諸州次第略定。帝如汴梁。改為開封府。召徐達至行在。命率師北伐。諭之曰。中原之民久為羣雄所苦。故命將北伐。拯民水火。元祖宗功德在人。其子孫罔恤民隱。天厭棄之。君實有罪。民則何辜。前代革命之際。肆行屠戮。朕實不忍。諸將毋肆焚掠。妄殺人。元之宗戚咸俾安全。庶幾上答天心。下慰民望。達頓首受命。帝尋還應天。

都督馮勝克潼關。

師取河南。元李思齊張思道會兵駐潼關。火焚思道營。思齊移軍葫蘆灘。明師攻潼關。思齊奔鳳翔。思道奔郿城。

六月。平章楊璟克廣西。

璟攻永州。元將鄧祖勝斂兵固守。璟分營築壘。造浮橋。西江急攻之。祖勝力盡。仰藥死。遂克永州。以次定寶慶。全州。道州。藍山諸州縣。進攻靖江。不下。璟謂諸將曰。彼所恃西濠水耳。決其堤岸。破之必矣。乃遣將殺守堤兵。盡決濠水。築土堤。五道傅城。攻兩月。會廖永忠。朱亮祖自廣東取梧州。定潯。桂。鬱。林。亮

祖以兵來會其總制張瑄來約降瑄與之白帽為識夜半從寶賢門入執元平章也兒吉尼移師彬州降兩江土官黃英岑伯顏等永忠亦定南寧象州廣西悉平

秋閏七月元復擴廓帖木兒官爵命率師會諸將復河洛○明師克通州元帝奔上都八月徐達入元都元監國淮王帖木兒不花死之

徐達帥師發開封遣裨將分道徇河北地連下衛輝彰德廣平次臨清使傅友德開陸道通步騎顧時浚河通舟師會常遇春已克德州合兵取長蘆扼直沽作浮橋濟師水陸並進大敗元軍於河西務進克通州知樞密院事卜顏帖木兒力戰被禽死之元帝詔淮王帖木兒不花監國以慶童為左丞相同守京城遂御清寧殿集三宮后妃皇太子議避兵北行左丞相失列知樞密院事黑廝官者趙伯伯顏不花以為不可帝不聽伯顏不花慟哭曰天下者世祖之天下陛下當以死守奈何棄之卒不聽夜半開建德門北去達陳兵齊化門將士填濠登城入淮王及左丞相慶童平章迭兒必失朴賽因不花右丞相張康伯御史中丞滿川等不降殺之餘不戮一人封府庫及圖籍寶物令指揮張勝以兵千人守宮殿門使宦者護視宮人妃主禁士卒毋侵暴吏民安堵捷聞詔示天下以大都路為北平府置六衛留都督副使孫興祖守之右丞薛顯叅政傅友德巡古北諸隘口

以應天為南京開封為北京○始建六部

中書省初設四部掌錢穀禮儀刑名營造之務至是置吏戶禮兵刑工六部設尚書侍郎等官大赦

詔赦殊死以下恤從征將士家逋卒許自首輸賦道遠者官為轉運災荒以實聞避亂民復業者聽墾荒地復三年衍聖公襲封及授曲阜知縣並如前代制有司以禮聘致賢士毋非時決重囚除書籍田器稅貸通賦蒙古色目人有材能者許擢用鰥寡孤獨廢疾者存恤之民年七十以上復一子他利害當興革不在詔內者有司具以聞

帝如北京。○放元宮人。○江西行省叅政陶安卒。

安博涉經史。帝渡江時。安首謁軍門。陳王道。吳元年。徵諸儒議禮。命安為總裁官。諸禮率多安所裁定。至是卒。追封姑孰郡公。

冬十月。帝還南京。○十一月。遣使訪求賢才。○十二月。徐達克太原。元擴廓帖木兒走甘肅山西平。

達既定元都。進取山西。常遇春先下保定中山真定。馮勝湯和。下懷慶度太行。取澤潞。擴廓遣將來禦戰於韓店。楊璟大敗。會元帝自開平命擴廓復大都。擴廓乃引兵出雁門。由居庸以攻北平。達聞之。謂諸將曰。擴廓遠出。太原必虛。北平有孫都督足以禦之。今乘敵不備。直擣太原。所謂批亢擣虛者也。彼若還救太原。進退失據。必成禽矣。諸將皆曰善。乃率師趨太原。擴廓至保安。聞之。果還救。遇春謀於達曰。我騎兵雖集。步卒未至。驟與戰。必多殺傷。若夜襲之。可得志。達然之。會擴廓將豁鼻馬來約降。請為內應。達夜選精騎襲其營。擴廓方燃燭治軍書。倉卒不知所出。踣一足。乘驂馬。從十八騎遁。豁鼻馬降。得甲士四萬。遂克太原。乘勢收大同。分遣馮勝等。徇猗氏平陽絳州。禽其守將。榆次平遙介休。以次下山西悉平。

明太祖高皇帝。洪武二年春正月。立功臣廟。

帝親定功臣位次。以徐達為首。次常遇春。李文忠。鄧愈。湯和。沐英。胡大海。馮國用。趙德勝。耿再成。華高。丁德興。俞通海。張德勝。吳良。吳楨。曹良臣。康茂才。吳復。茅成孫。興祖。凡二十一人。立廟雞鳴山下。死者像祀。生者虛其位。又以廖永安。俞通海。張德勝。桑世傑。耿再成。胡大海。趙德勝。七人。配享太廟。

免山東北平山西河南及畿內諸郡田租。○倭寇山東。○二月。詔修元史。

大都既克。得元十三朝實錄。乃詔修元史。以左丞相李善長監修。前起居注宋濂。漳州府通判王禕為總裁。徵山林隱逸之士。汪克寬。胡翰。陶凱。曾魯。高啟。趙訪等十六人。為纂修。閱六月。書成。而元統以後之史未備。乃命儒士歐陽祐等。往北平採遺事。明年續修。仍以濂禕總其事。帝召元舊臣。問元政得失。

馮翊對曰元有天下以寬得之亦以寬失之帝曰但聞寬則得衆未聞以寬失者也夫步急則躓弦急則絕民急則亂居上正當用寬元季君耽於逸樂其失在於縱弛實非寬也聖王之道寬而有制不以廢事為寬簡而有節不以慢易為簡適中則無弊矣

元丞相也速侵通州平章曹良臣擊走之

大軍徇山西北平守備單弱曹良臣守通州兵不滿千人也速將萬騎營白河良臣曰吾兵少不可與戰當以計走之乃於瀕河舟中多立赤幟亘十餘里鉦鼓聲相聞也速驚遁良臣出精騎逐北百餘里元兵自是不敢窺北平

帝耕藉田○三月徐達克奉元常遇春克鳳翔

元將李思齊據鳳翔張思道孔興脫列伯等駐鹿臺以衛奉元徐達兵入關思道遁去郭子興將輕騎直搗奉元守將葉城走御史桑哥失里郎中王可檢討阿失不花三原尹朱春俱抗節死遂改奉元路為西安府戶賑米三石民大悅遇春兵至鳳翔思齊奔臨洮

夏四月命博士孔克仁授諸子經

功臣子弟並令入學

馮勝徇臨洮李思齊降

時張思道弟良臣守慶陽徐達會諸將議所向皆曰張思道之才不如李思齊而慶陽易於臨洮請先慶陽達曰不然慶陽城險兵精猝未易拔臨洮西控羌戎北界河湟得之其人足備戰鬪物產足佐軍儲蹙以大軍思齊不西走則束手就降矣臨洮既克於旁郡何有遂度隴克秦州下伏羌靈遠入鞏昌遣馮勝逼臨洮思齊果不戰降

五月朔日食○御史中丞章溢卒

溢初應聘與劉基葉琛宋濂同至應天帝勞之曰我為天下屈四先生今天下紛紛何時定乎溢對曰

天道無常。惟德是輔。惟不嗜殺人者能一之耳。浙東設按察使。以溢為僉事。督饋餉平諸寇。數有功。帝即位。與劉基並拜御史中丞。時廷臣伺帝意多嚴苛。溢獨存大體。受詔赴閩。擇鄉兵行之處。州遣母喪。乞終制。不許。鄉兵既集。再乞終制。許之。哀毀卒。帝痛惜。親撰文祭之。

六月。常遇春克開平。元帝奔和林。

遇春下鳳翔。詔還備北平。以李文忠副之。帥步騎九萬。敗元將江文清於錦州。敗也速於全寧。進攻太興州。分千騎為八伏。守將夜遁。盡禽之。遂拔開平。元帝北走。追奔數百里。獲其宗王慶生。平章鼎住等。斬之。凡得將士萬人。車萬輛。馬三千匹。牛五萬頭。薊北悉平。

秋七月。征虜副將軍鄂國公常遇春卒於軍。詔李文忠領其眾。

遇春師次柳河川。卒。遇春沉鷲果敢。善撫士卒。摧鋒陷陣。未嘗敗北。雖不習書史。用兵輒與古合。嘗自言能將十萬眾。橫行天下。軍中稱常十萬。長於大將軍。連二歲。聽約束。惟謹。一時名將。稱徐常喪歸。帝用宋太宗喪趙普故事。臨於龍江。追封開平王。諡忠武。

八月。元兵攻大同。李文忠擊敗之。

文忠會徐達攻慶陽。行次太原。聞大同圍急。謂左丞趙庸曰。間外之事。苟利於國。專之可也。遂出雁門。敗元遊兵於馬邑。禽其平章劉帖木。進至白楊門。大雨雪。已駐營。文忠令移前五里。阻水自固。元兵乘夜來劫。堅壁不動。質明。敵大至。以二營委之。殊死戰。敵疲。乃出精兵。左右擊。大破之。禽其將脫列伯。俘戮萬餘人。窮追至莽哥倉而還。

定內侍官制。

諭吏部曰。內臣但備使令。毋多人。馭之之道。當使畏法。勿令有功則驕恣矣。

封王顥為高麗國王。徐達克慶陽。禽張良臣。斬之。陝西平。

達自臨洮下蘭州。襲走元豫王。盡收其部落輜重。還出蕭關。克平涼。張思道懼。使其弟良臣守慶陽。而

自奔寧夏為擴廓所執。良臣以慶陽降。達遣薛顯受之。已而復叛。襲傷顯。達督兵圍之。良臣求援於擴廓。擴廓遣將攻原州。陷涇陽。為慶陽聲援。達遣馮勝扼驛馬關。敗其將良臣。被圍久。數出戰。不利。糧乏。絕。至者人汁丸泥嚙之。守者遂開門降。良臣父子俱投井。引出斬之。時元賀宗哲攻鳳翔。指揮使金興旺與知府周煥嬰城守。敵編荊為大箕形。如半舫。五人負之攻城。矢石不能入。投藁焚之。輒颺起。乃置鈎藁中。擲著其隙。火遂熾。敵棄箕走。復為地道薄城。攻不已。會百戶王輅收臨洮降卒。還入城共守。敵拔營去。衆欲追之。輅曰。未敗而還。誘我也。偵之。至五里坡。伏果發。還師。復圍城。衆欲走。興旺叱曰。天子以城畀我。豈可去耶。以輅所將皆新附。乃括城中貲。令曰。敵退。當大犒新兵。新兵喜協力。固守持十五日。敵聞慶陽下。乃引去。

修禮書。

明年書成名大明集禮。

九月置中都。

以臨濠為中都。營城闕宮殿如京師制。

冬十月詔天下府州縣皆立學。

三年春正月遣徐達李文忠分道北伐。

時元主尚在近塞。而擴廓犯蘭州。指揮于光力戰死。帝以達為大將軍。文忠及馮勝鄧愈湯和副之。分二道出兵。達自潼關出西道。擣定西。取擴廓。文忠自居庸出東道。絕大漠。追元主。二月文忠至興和。降其守將。進兵察罕腦兒。禽元平章竹貞。次駱駝山。走平章沙不丁。次開平。降平章上都罕等。

吏部請誅有罪於僭虐不許。

帝曰。前代謂僭虐為化外。以處罪人。朕今天下一家。若有風俗未淳。宜更擇良吏治之。豈宜居罪人耶。二月追封郭子興為滁陽王。○夏四月封子九人為王。